

Communicaziun a las medias dals 27 da favrer 2026 (**Communicaziun ad hoc tenor l'art. 53 RQ**)

La BCG cun in resultat annual solid

La Banca Chantunala Grischuna (BCG) concluda l'onn da gestiun 2025 cun in gudogn legraivel da 224.6 milliuns francs, malgrà l'ambient pretensius cun tschains bass. Il model da success da la BCG cun la fatschenta d'investiziuns e da provediment sco segunda pitga sper la fatschenta da tschains sa cumprova e gida da crear in'auta valor agiuntada en las regiuns. Las participantas ed ils participants survegnan danovamain ina dividenda da 47.50 francs per scrit da participaziun.

Las cifras distinctivas

- gudogn dal concern: CHF 224.6 miu. / -2.1%
- relaziun da custs e d'entradas I: 48.0% / onn precedent: 46.7%
- volumen da fatschenta: CHF 78.8 mia. / +3.5%
- emprests a la clientella: CHF +0.4 mia. / +1.5%
- afflussiun netta da novs daners: CHF -0.7 mia. / -1.3%
- dividenda: CHF 47.50 / nunmidada

Il resultat annual legraivel 2025 conferma danovamain il model da fatschenta robust da la Banca Chantunala Grischuna. Daniel Fust, CEO da la banca, resumescha l'onn da gestiun sco suonda: «Il resultat 2025 persvada cun in'auta rentabilitad. La buna prestaziun operativa, la creschientscha solida da la fatschenta ipotecara e la contribuziun da nossas participaziuns al gudogn cumprovan la strategia da success da la BCG.»

In gudogn dal concern legraivel en in ambient pretensius

Entant che las cumponentas operativas dal retgav creschan en la fatschenta da tschains, la fatschenta da cumissiuns e la fatschenta commerciala, s'augmentan er il provediment per cas da ristga e las investiziuns per il futur. La conseguenza è ch'il resultat da fatschenta sa reducescha per 9.6% sin 229.9 milliuns francs. Las participaziuns contribueschan vinavant al bun resultat cun in gudogn legraivel dad 8.6%. Il gudogn dal concern è cun 224.6 milliuns francs levamain pli bass che l'onn precedent (-2.1%).

In provediment prudent per cas da ristga

La rendita da la fatschenta è sa sbassada per 2.9%. Il motiv per questa reduziun è il provediment per cas da ristga. Il resultat da la fatschenta da tschains senza il provediment per cas da ristga s'augmenta per 1.3%. Las marschas ch'èn sa sminuidas pervi da l'ambient da tschains nulla vegnan cumpensadas da la creschientscha e da la buna strategia d'investiziun da l'agen chapital da la BCG. Il resultat da la fatschenta da cumissiuns e da la fatschenta da servetschs s'augmenta per 1.9%, quai surtut pervi dal svilup positiv da la bursa e l'acquisiziun da volumens d'investiziun en la sedia principala. La quota da la fatschenta independenta dals tschains importa uschia 37.7% e conferma il model da gestiun robust cun la fatschenta d'investiziuns e da provediment sco segunda pitga ferma.

La productivitat da la banca è vinavant auta

Ils custs da fatschenta èn s'augmentads per 4.1%. Per garantir ses success er en l'avegnir investescha la BCG cuntinuadamain en la cussegliaziun cumplessiva da la clientella ed en la digitalisaziun, ed ella recrutescha a medem temp nov persunal qualificà. Sch'ins cumpareglia las expensas cun ils retgavs generads, sa resulta ina relaziun da custs e d'entradas legraivla da 48.0%.

Ina vasta creschientscha en la fatschenta da la clientella privata

Il volumen da fatschenta da la BCG munta a 78.8 milliardas francs (+3.5%). Ils emprests a la clientella èn s'augmentads per 1.5%. La creschientscha dals credits è d'attribuir sco gia l'onni precedent surtut a la fatschenta tradiziunala cun clientella privata ed interpresas pitschnas e mesaunas en il martgà indigen. La facultad da la clientella è creschida per 4.5%. Entant ch'il svilup positiv da la bursa ha manà ad in augment, han las deflussiuns da singuls clients instituziunals pli gronds consequenzas negativas sin l'afflussiun da novs daners nets. En il sector da la clientella privata e da la clientella da fatschenta crescha la BCG a moda solida cun 0.3 milliardas francs.

Fitg gronda dotaziun d'agen chapital

Ils agens meds imputabels importan 2.8 milliardas francs. La BCG dat gronda paisa a la segirezza ed a la stabilitad. La resistenza en temps da crisa sco finamira strategica sa mussa en l'auta quota da chapital da 20.0% (CET-1-Ratio).

Il chantun, las participantas ed ils participants e la publicitad profitesch

La dividenda è cun 47.50 francs tuttina auta sco l'onni passà. En total sbursa la BCG dividendas en l'import da 118.8 milliuns francs al chantun Grischun ed a las persunas che possedan scrits da participaziun. Il chantun Grischun survegn 103.6 milliuns francs inclus l'indemnisaziun da la garanzia chantunala. Quai correspunda a var 503 francs per Grischuna e Grischun.

In studi conferma l'importanza regionala da la BCG

Ultra da la bilantscha annuala legraivla renda Daniel Fust attent ad in nov studi da la BAK Economics AG e da la Scola auta spezialisada dal Grischun. Quel ha examinà l'importanza economica da la BCG en il chantun e sias regiuns. «La BCG creescha grazia a ses effects directs ed indirects ina valur agiuntada annuala da 415 milliuns francs e contribuescha uschia fermamain a la forza economica dal chantun. Ultra da quai cumprova il studi che l'effect na sa restrenscha betg mo a la fatschenta da banca, mabain ch'el promova interpresas, rinforza las regiuns e surpiglia responsabladad per la collectividat en il Grischun», declera Daniel Fust.

Program strategic 2026–2030 e perspectivas

Heinz Huber è dapi il 1. da fanadur 2025 president da la banca ed ha uschia pudì collavurar a la nova direcziun strategica: «La strategia 2026–2030 sa funda sin quai ch'è sa cumprovà e s'adattescha a moda flexibla a las midadas tecnologicas e socialas.» Uschia po la Banca Chantunala Grischuna nizzegiar las schanzas dal nov mund da lavur e da las novas tecnologias. Sias finamiras strategicas èn ina cussegliaziun cumplessiva e d'emprima qualitat en l'entir chantun, in ferm engaschament en e per il Grischun, in'ulteriura diversificaziun dals retgavs sco er in'excellenta stabilitad, effizienza e fitness d'interpresa. En vista ad in ambient pretensius da tschains bass e da martgads d'aczias positivs quinta la BCG l'onn 2026 cun in gudogn dal concern pli u main tuttina aut sco quel da l'onn precedent.

Contact:

Thomas Müller, thom.mueller@gkb.ch, telefon +41 81 256 83 11

Bernhard Kobel, bernhard.kobel@gkb.ch, telefon +41 81 256 88 01

Banca Chantunala Grischuna, chascha postala, 7001 Cuir | medien@gkb.ch / gkb.ch/medien

Banca Chantunala Grischuna.

La Banca Chantunala Grischuna porscha tut quai ch'i dovra per ina banca universala moderna – per persunas privatas, l'economia ed il maun public. L'interpresa è represchentada en tut las regiuns dal Grischun. Cun passa 1'000 collavuraturas e collavuratur è la BCG ina da las pli grondas patrunas en il chantun. Ultra da sias activitads economicas s'engascha ella cun ses sponsoradis, ses fond da contribuziuns, sia collecziun d'art e sia lavur voluntara.

La BCG dispona da participaziuns da maiortad a la Banca privata Bellerive AG ed a l'Albin Kistler AG. Ultra da quai è ella acziunaria unica da la BZ Bank Aktiengesellschaft. Il scrit da participaziun BCG è quotà a la bursa dapi il 1985. Al resultat da gestiun 2025 è il chantun Grischun sa participà cun 103.6 milliuns francs incl. l'indemnisaziun per la garanzia statala.

Termins:

Radunanza da las participantas e dals participants: 9 da matg 2026

Rendaquint semestral 2026: 21 d'avust 2026